

# lokal

HM 18/9/23 p12

# Dah tak kenal **baling selipar!**

**Permainan tradisional perlu dijadikan kokurikulum di sekolah**

**Kuala Lumpur**

**P**ermainan tradisional yang merupakan khazanah negara perlu dijadikan sebahagian daripada kokurikulum di sekolah, bagi memberikan pendedahan dan mempopularkan kembali permainan itu kepada generasi baharu.

Seorang guru Mohd Nasir Ismail berkata kebanyakan generasi kini terutama yang lahir tahun 2000-an, sudah tidak lagi mengenali dan mengetahui permainan tradisional, kerana mereka tidak didedahkan dengan aktiviti itu sejak dari kecil lagi.

Beliau berkata berbeza dengan zaman sekitar 1900an, kanak-kanak ketika itu masa lapang diisi dengan permainan tradisional seperti congkak, baling selipar dan gasing, yang cukup berbeza dengan keghairahan kanak-kanak sekarang dengan permainan dalam talian.

“Generasi sekarang dibesarkan dan sudah terbiasa



PERMAINAN tradisional Kabaddi diadakan pada majlis perasmian Festival Permainan Malaysia @ Kuala Lumpur 2023 di Dataran Merdeka.

dengan perkembangan teknologi, bahkan di usia yang kecil lagi, mereka lebih tertarik dengan bermain gajet berbanding permainan tradisional. Jadi, dalam usaha mengekalkan kesinambungan warisan (permainan tradisional) negara ini, wajar pihak yang bertanggungjawab memastikan ia dimasukkan sebagai salah satu kokurikulum di sekolah,” katanya kepada Bernama pada Festival Permainan

**“Generasi sekarang dibesarkan dengan perkembangan teknologi, bahkan di usia yang kecil lagi, mereka lebih tertarik dengan bermain gajet berbanding permainan tradisional”**

Malaysia @ Kuala Lumpur (FPM@Kuala Lumpur) di Dataran Merdeka di sini, kelmarin.

FPM@Kuala Lumpur yang memasuki penganjuran kali kelapan pada tahun ini yang berakhir semalam dengan penglibatan 1,520 peserta permainan tradisional, antaranya congkak, galah panjang, dam aji, kabaddi, termasuk tarian magunatip (tarian buluh) Sabah dan aktiviti menyumpit Sarawak.

Ia dianjurkan bersama oleh Jabatan Kebudayaan dan Kesenian Negara, Kuala Lumpur dengan kerjasama Dewan Bandaraya Kuala Lumpur (DBKL) dan Persatuan Sukan Tradisional Malaysia.

Senada dengan Mohd Nasir, pengusaha permainan tradisional Norhayati Nordin berpendapat aspek pemuliharaan permainan tradisional yang digagaskan oleh kerajaan, harus dimulakan di peringkat

akar umbi secara praktikal dan bukan pembelajaran melalui buku teks semata-mata.

“Kanak-kanak perlu didedahkan dengan permainan tradisional secara sendiri supaya mereka lebih menikmati pengalaman keseronakan memainkannya...dan kita sebagai pengusaha bersedia untuk mengadakan bengkel dan klinik kaedah permainan tradisional yang betul,” katanya.

Sementara itu, Menteri Pelancongan, Seni dan Budaya Datuk Seri Tiong King Sing berkata sejak penganjuran festival itu pada 2015, ia telah merekodkan pulangan pendapatan melebihi RM1.5 juta dengan lebih 200,000 pengunjung.

Beliau berkata sehingga Ogos tahun ini, sebanyak 28 jenis permainan tradisional masyarakat Malaysia telah diisytiharkan sebagai Warisan Kebangsaan, di bawah Akta Warisan Kebangsaan 2005 (Akta 645) melalui Majlis Perisytiharan Warisan Kebangsaan.

“Jabatan Warisan Negara (JWN) dan JKKN perlu lebih bekerjasama dengan badan bukan kerajaan (NGO) permainan tradisional, bagi mencungkil dan mengintegrasikan serta mendigitalkan semua permainan tradisional, khususnya permainan tradisional hampir pupus,” katanya.